

# Ante parlar, per favor, ingagia le cerebro

---

*Colligite e traducite in interlingua per Frank Pfaff, SUA*

■ Quando io vide in le television ille parve infantes affamate ubique in le mundo, io debe plorar. Io ipse amarea esser magre como isto, ma sin ille muscas e morte e tal cosas.

*Mariah Carey, cantatrice*

■ Question: Si tu poteva viver pro semper, esque tu lo facerea, e proque?

Responsa: Io non viverea pro semper, proque nos non deberea viver pro semper, proque si nos debeva viver pro semper, allora nos viverea pro semper, ma nos non pote viver pro semper, e isto es proque io non viverea pro semper.

*Miss Alabama in le concurso pro Miss Universo 1994*

■ Recercatores ha discoperite que chocolate produce approximativemente le mesme reacciones cerebral como marijuana. Le recercatores ha discoperite etiam altere similaritates inter le duo, ma illes non pote plus rememorar se quales...

*Matt Lauer, commentator sur NBC Hodie*

■ Io non ha committite un crimine. Lo que io faceva era que io non me conformava al lege.

*David Dinkins, burgomaestro de New York City, respondente al accusationes que ille non pagava su taxas*

■ Fumar occide. Si vos es occidite, vos ha perdite un parte multo importante de vostre vita.

*actrice Brooke Shields, durante un intervista pro devenir un portavoce pro un campania anti-fumar del governmento*

■ Io nunquam habeva un chirurgia major del genu sur alcun altere parte de mi corpore.

*Winston Bennett, jocator de basketball del Universitate Kentucky*

■ Con exception del homicidios, Washington ha un del ratas del crimine le plus basse del pais.

*Marion Berry, burgomaestro de Washington, DC*

■ Le stratas in Philadelphia son secur. Il es solmente le populo qui los face insegur.

*Frank Rizzo, ex-chef del policia e burgomaestro de Philadelphia*

■ Post haber trovate nulle candidatos qualificate pro le position de principal, le consilio de scholas annuncia con placer extreme le appunctamento de David Steele al posto.

*Philip Streifer, superintendente de scholas, Barrington, Rhode Island*